

**Kitsissunnguit eqqissimatitaanissaat pillugu Namminersornerullutik Oqartussat nalunaarutaannut siunnersuut nr. 11, 17. april 2008-meersoq**

Pinngortitamik illersuineq pillugu Inatsisartut inatsisaanni nr. 29-mi 18. december 2003-meersumi § 5, imm. 1, nr. 8-9, § 16, imm. 1, § 39, imm. 6, § 46 aamma § 60, imm. 2, 4-lu malillugit aalajangerneqarpoq:

*Siunertaq killiliinerlu*

**§ 1.** Qeqertat ataatsimut taaneqartartut Kitsissunnguit (Grønne Ejland) imarlu eqqaanniittoq Qasigiannnguit Aasiaallu kommuniiniittut eqqaannilu imaq eqqissimatitassanngortinneqarput. Eqqissimatitsinermi siunertaavoq sumiiffiup assigiinngitsunik uumasooqarluarnerata illersornerata pitsanngorsarnissaa immikkut pingaartillugu imeqqutaallat erniortartut kiisalu qeqertat silaannarissumiiffittut pingaarutaat qulakkeerumallugu.

*Imm. 2.* Sumiiffik tassaavoq Ramsarimi isumaqatigiissut naapertorlugu Ramsarområde nr. 388-itut toqqarneqarsimasoq, tassalu pisortat pisussaapput sumiiffiup illersornissaa siuarsassallugu.

**§ 2.** Sumiiffik eqqissimatitaasoq bilag 1-imi 2-milu nalunaarsimavoq.

*Imm. 2.* Sumiiffiup eqqissimatitap ilaa pingasunngorlugu agguarneqarpoq. Immikkoortoq 1-imiipput sumiiffiup eqqissimatitap kitaatungaa ilaallutik qeqertat Saattuarsuit aamma Niaqornaq kiisalu imartaat qeqertaniit 500 meter tikillugu. Immikkoortoq 2-miippoq qiterleq Kitsissunnguit ikkarlullu kangillerpaaq kiisalu imartaa qeqertaniit ikkarlummiillu 500 meterinik avasissusilik. Immikkoortumut ilaavortaaq immikkoortoq 2A. Immikkoortoq 3-miippoq sumiiffiup eqqissimatitap kangillersaa ilaallutik qeqertat Innarsuatsiaaq, Kingittuarsuk aamma Angissat kiisalu imartaa qeqertaniit 500 meterit avasitsigisoq tikillugu.

*Nalinginnaasumik iserfiginera atorneralu*

**§ 3.** Kikkut tamarmik sumiiffimmut eqqissisitamut isersinnaapput killilersuutit nalunaarutip matuma kingunerisai atorlugit.

**§ 4.** Sumiiffimmi eqqissimatitami inerteqqutaavoq nunap immallu mingutsinnissaat imaluunniit igitat suusulluunniit maangaannaq qimannissaat, tamatumani ilanngullugit piniutit suusulluunniit, nalunaaqutsersuinerit imaluunniit ilisimatuutut atortut.

*Imm. 2.* Naasut ajoquseqqusaanngillat nunalu allanngorteqqusaanani. Aamma naasut suulluunniit, naasut sananeqaataasa ilaasa, uumasut, manniit kiisalu meqqut qiviullu katersornissaat inerteqqutaavoq, taamaattoq takuuk § 11, imm. 1.

*Imm. 3.* Imm. 2-mi inerteqqutaagaluortoq naasunik katersuisoqarsinnaavoq aalisarnermut, aallaaniarnermut piniarnermullu atatillugu nerisassiornermi ikummatissanik.

*Tupertorneq innermillu ammaannartumik atuineq*

§ 5. Sumiiffiup eqqissisimatitap iluani uninngaarnermi tupertorneq innermillu ammaannartumik atuineq, tamatumani ilanngullugu gassimik spritimillu ikumatitsiviit il.il. atoqqusaanngillat, taamaattoq takuuk imm. 2-5.

Imm. 2. Immikkoortoq 2A-mi tupertorneq innermillu ammaannartumik atuineq, tamatumani ilanngullugu gassimik spritimillu ikumatitsiviit il.il. atornissaat inerteqqutaanngilaq 1. novembarimiit 30. aprilimut.

Imm. 3. Immikkoortoq 2A-mi tupertorneq aamma innermik ammaannartumik atuineq, tamatumani ilanngullugu gassimik spritimillu ikumatitsiviit il.il. 1. majimiit 31. oktobarimut inerteqqutaanngillat, taamaattoq sivilisunerpaamik sumiiffimmi ataatsimi ullut unnuallu pingasut. Tupertoqqinneq aamma innermik ammaannartumik atuineq, tamatumani ilanngullugu gassimik spritimillu ikumatitsiviit il.il. atornerat tamatuma kingorna kingornatigut taamaallaat pisinnaavoq sumiiffimmi nutaami ullut unnuallu pingasut sumiiffimmit sioqqullugu atornerartumit minnerpaamik 100 meterinik ungasinnerusumi.

Imm. 4. Imm. 1-imi inerteqqummut ilaanngilaq immikkoortoq 3-mi tupertorneq aamma innermik ammaannartumik atuineq, tamatumani ilanngullugu gassimik spritimillu ikumatitsiviit il.il.

*Illuliorneq, sanaartorneq, aqqusineeqqat il. il.*

§ 6. Sumiiffiup eqqissisimatitap iluani inerteqqutaapput illuliorneq allanilluunniit nunamut aalajangikkanik sanaartorneq, illut pioreersut ilanerat allanngortiterneralluunniit, kiisalu aqqusinniorneq aqqusineeraliornerlu, taamaattoq takuuk imm. 2-4.

Imm. 2. Immikkoortoq 3-mi komunalbestyrelsi kommuni immikkoortoq 3-p inissisimaffigisaa tusarniaavigereerlugu Attaveqarnermut Avatangiisinullu Naalackersuisoqarfiup akuerisinnaavaa illuliorneq allanillu nunamut aalajangikkanik sanaartorneq ingerlatitseqqinnermik takornariarnermillu siunertaqartunik. Taamatut akuersinermi Attaveqarnermut Avatangiisinullu Naalackersuisoqarfiup illunut sanaartukkanulluunniit aalajangersimasunut allanut, suunerinut, inissinnerinut, portussusiinut ilusilernerinullu piumasaasut aalajangersarsinnaavai.

Imm. 3. Sumiiffiup eqqissisimatitap iluani illuaqqat piniariartarfiit ataannarsinnaapput aserfallatsaalineqarlutillu. Kommunimi immikkoortup inissisimaffiani kommunalbestyrelsi tusarniaavigereerlugu Attaveqarnermut Avatangiisinullu Naalackersuisoqarfiup akuerisinnaavaa nutaanik pioreersut taartissaannik illuaraliorneq. Taamatut akuersinermi Attaveqarnermut Avatangiisinullu Naalackersuisoqarfiup illuaqqap piniariartarfiup angissusissaanut, suuneranut, inissinneranut, portussusianut ilusilersorneranullu piumasaasut aalajangersarsinnaavai.

Imm. 4. Sumiiffiup eqqissisimatitap iluani immikkoortumi kommunimi kommunalbestyrelsi tusarniaaffigereerlugu Attaveqarnermut Avatangiisinullu Naalackersuisoqarfiup akuerisinnaavaa aqqusineeraliorneq. Akuersissummi taamaattumi Attaveqarnermut Avatangiisinullu Naalackersuisoqarfiup aqqusineeqqat sananerannut, tamatumani ilanngullugu atortussat naapertuuttut atornerat, piumasaasut aalajangersarsinnaavai.

Imm. 5. Illuliornermut allanilluunniit nunamut aalajangikkanik sanaartorneq atattillugu kiisalu aqqusineeraliornermut atattillugu nuna naasuilu qangatut pissuseqalersinneqassapput.

*Umiartorneq, nunamut niuneq angalanerlu*

§ 7. Immikkoortoq 3-mi 1. majimiit 31. oktobarimut inuit angalaqatigiit 12-it sinneqartut pisummik angalanissaat inerteqqutaavoq, taamaattoq takuuk imm. 2.

Imm. 2. Angalaqatigiit 12-nit amerlanerusut angalanissaat Attaveqarnermut Avatangiisinullu Naalackersuisoqarfiup akuerisinnaavaa.

§ 8. Immikkoortuni 1-imi 2-milu umiartorneq, nunamut niuneq angalanerlu inerteqqutaapput 1. majimiit 31. oktobarimut, taamaattoq takukkit imm. 2-6.

Imm. 2. Søfartsstyrelsi inulluunniit Søfartsstyrelsip pisinnaatitaa immikkoortoq 2-mi angalasinnaavoq naaralaartitsiviup (raconfyret) nakkutigineranut atatillugu.

Imm. 3. Kommune susassaartoq tusarniaaffigereerlugu Attaveqarnermut Avatangiisinullu Naalackersuisoqarfiup immikkoortoq 2-mi angalaarneq akuerisinnaavaa angalaarniat inummik nunatsinni pinngortitamik pinngortitallu illersugaanera pillugu inatsinik ilisimasaqartumik ilitsersorteqarpata. Akuersissummi ilitsersugaalluni angalanerlut piumasaasut aalajangersarneqarsinnaapput, tamatumani ilanngullugu angalaarnerit amerlassusiat, sivilissusiat kiisalu angalaarnermi peqataasut amerlassusiat.

Imm. 4. Immikkoortoq 1-imi 2-milu annanniarluni umiarsualivissittoqarsinnaavoq silap pissusia patsisaalluni tamanna pisariaqarpat. Uninngaarneq Attaveqarnermut Avatangiisinullu Naalackersuisoqarfimmut nalunaarutigineqassaaq kingusinnerpaamik uninngaarnerup naaneranit qaammatip ataatsip qaangiunnerani.

Imm. 5. Immikkoortoq 2A-mi umiarsualivissillunilu angalaartoqarsinnaavoq niuneq kujammut sammernani pippat.

Imm. 6. Immikkoortoq 1-imi aalajangersakkanut ilaanngillat annaassiniarneq ujarlernerlu.

§ 9. Sumiiffiup eqqissisimatitap iluani motorilinnik cykelinillu angalaneq inerteqqutaavoq.

§ 10. Sumiiffik eqqissisimatitap qulaallugu 500 meter ataallugu qutsissusilikku timmisartornerit inerteqqutaapput sumiiffiup uumasui pillugit, taamaattoq takuuk imm. 2.

Imm. 2. Imm. 1-imi aalajangersakkanut ilaanngillat annaassiniarnerit ujarlernerillu.

*Piniarneq, aallaaniarneq, mannissarneq aalisarnerlu il.il.*

§ 11. Immikkoortoq 1-imi, 2-mi 3-milu piniarneq, aallaaniarneq, mannissarneq aalisarnerlu inerteqqutaapput 1. majimiit 31. oktobarimut. Aalisarnermut sakkut, tamatumani qassutit ilanngullugit, peerlugillu nassarneqassapput 1. maj tikitsinnagu, taamaattoq takuuk imm. 2.

Imm. 2. Immikkoortoq 2-mi 3-milu nipisanniartoqarsinnaavoq 1. majimiit 10. junimut. Aalisarnermi atortut, qassutit ilanngullugit, peerneqarlutillu nassarneqassapput kingusinnerpaamik 10. juni.

Imm. 3. Sumiiffiup eqqissisimatitap iluani aalisakkat sinnikuisa iginnissaat inerteqqutaavoq.

*Aqutsineq, nakkutilliineq immikkullu akuersineq*

§ 12. Kommunalbestyrelsit susassaartut tusarniaavigereerlugit Attaveqarnermut Avatangiisinullu

Naalackersuisoqarfik sumiiffiup eqqissisimatitap aqunnissaanut pilersaarusiussaaq.

§ 13. Kommunip susassaqtartup nalunaarutip matuma malinneqarnissaa isumagissavaa. Aalisarnerup, aallaaniarnerup piniarnerullu aqunneqarnerat Aalisarnermut, Piniarnermut Nunalerinermullu Naalackersuisoqarfiup isumagisassaraa.

§ 14. Attaveqarnermut Avatangiisinullu Naalackersuisoqarfik § 5, imm. 1-imi, § 6, imm. 1-imi, § 8, imm. 1-imi, kiisalu § 9-mi aalajangersakkanit allaasumik akuersisinnaavoq tamanna eqqissisimatitsinermit anguniakkanit allaanerungippat.

§ 15. § 4, imm. 1-2-p, § 5, imm.1-ip aamma imm.3 pkt.2-p, § 6, imm. 1-ip, § 7, imm. 1-ip, § 8, imm. 1-ip, § 9-p, § 10, imm. 1-ip, § 11, imm. 1-imi. imm. 2-mi pkt 2-p aamma imm. 3-p unioqqtinneqarnerat akiliisitsinermik kinguneqarsinnaapput.

Imm. 2. § 6, imm. 2-4, kiisalu § 8, imm. 3-mi piunasaasut unioqqtinneqarnerat akiliisitsinermik kinguneqarsinnaavoq.

Imm. 3. Suliffeqarfik naalagaaffimmit, Namminersornerullutik Oqartussanit, kommunimit kommunilluunniit ataatsimoortunit tamakkiisumik ilaannakortumilluunniit pigineqartoq, kommunalbestyrelsit nunaqarfimmilu aqutsisut il.il. pillugit inatsisartut inatsisaannut ilaasut, aktieselskabi, anpartsselskabi assigisaalluunniit unioqqtitsisuusimappat eqqartuussisarneq pillugu suliffeqarfik il.il. akisussaatinneqarsinnaavoq. Taamaaqataanik atuuppoq unioqqtitsisuusimappata Namminersornerullutik Oqartussat, kommuni imaluunniit kommunit ataatsimoortut kommunalbestyrelsit nunaqarfimmilu aqutsisut il.il. pillugit inatsisartut inatsisaannut ilaasut.

Imm. 4. Imm. 1-3 malillugu akiliisitsissutit Landskassimut nakkassapput.

§ 16. Nalunaarut 1. maj 2008-mi atortuulissaaq.

*Namminersornerullutik Oqartussat, ulloq 17. april 2008*

Kim Kielsen

/

Steffen Ulrich-Lynge

